

Simplificar ed accelerar las proceduras

La regenza è pronta d'acceptar in'incumbensa da Reto Cramer (pcd Belfort)

■ (mc) La regenza è pronta d'acceptar in'incumbensa parlamentara da deputà Reto Cramer (pcd Belfort) ch'intenda da simplifitgar ed accelerar las proceduras da construcziun. Quai duai succeder en il rom da la revisiun da la lescha da planisaziun dal territori. En sia incumbensa segnada da 72 collegas pretenda Reto Cramer in'analisa cumplexiva davart la procedura per la permissiun da construcziun. Principalmain duain ils termins legals ed ils termins da liquidaziun ed en spezial ils termins d'exposiziun e protesta, la communicaziun da decisiuns da construcziun e da projects da construcziun vegnir scursanids, usche navant che quai è raschunavel. En connex cun il dretg da recurs da las organisaziuns per la protecziun da l'ambient stoppia vegnir prendi en mira in'acceleraziun da la procedura. Uschia duai vegnir examinada lur participaziun a proceduras ed ellas duain pudair sa participar a tschertas proceduras pir suenter ch'ils uffizis han prendi posiziun.

Er en cas da projects da construcziun che dovran ina permissiun supplementara stoppia vegnir cuntanschida in'acceleraziun tar ils posts involvids. Plinavant duai vegnir adattada la glista dals projects da construcziun che na basegnan betg ina permissiun da construcziun. Las vischnancas duain survegner la pussaivladad da prevair ulteriuras excepziuns. Er ina procedura electronica per la permissiun da construcziun sco cumplettaziun tar la furma sin palpieri stoppia vegnir examinada.

En il senn da la proporziunalitad duain mo ils documents e las cumprovas propi necessaris vegnir agiuntadas a la dumonda da construcziun. Tar projects da construcziun complexs e voluminus duain las vischnancas en cas da basegn pudair sa basar sin il sustegn da las persunas specialisadas dal chantun ed eventualmain pudair dumandar sin agen giavisch sustegn dal chantun.



Las proceduras per lubientschas da construcziun duain vegnir acceleradas e simplifitgadas.

MAD

Revisiun da la lescha da la planisaziun dal territori è sin rucca

Sco la regenza scriva è il chantun londervi d'adattar la lescha davart la planisaziun dal territori e l'ordinaziun executorica correspundenta a basa da la revisiun da la lescha federala che è entrada en vigur il matg 2014. Tenor il plan da termins duai la debatta en il cussegl grond avair lieu l'atun 2017. Questa revisiun duai era vegnir nizzate per suttametter al cussegl grond tranter auter dumondas e propostas formuladas en l'incumbensa parlamentara da deputà Cramer. La regenza è perquai pronta d'acceptar l'incumbensa.

Sco quai che la regenza conceda dati tar la procedura da permissiun effectivamain anc potenzial d'optimaziun sin tut ils stgalims, era sche l'acceleraziun e la coordinaziun da las procedu-

ras èn gia stadas temas impurtants tar l'ultima revisiun da l'onn 2004. Confurm a l'incumbensa Cramer vul la regenza examinar cun egl critic ed a basa da las experienschas da termins d'exposiziun e da prestaziun che valan per dumondas da construcziun la situaziun. Il pli grond problem en connex cun la durada da las proceduras na sajan però betg exnum ils termins legals concrets, mabain plitost la circumstanza ch'i vegnian deplorablamain savens inoltrads documents da dumonda insufficientes, constatescha la regenza. Pervia da las prescripziuns materialas adina pli complexas sajan las petentas ed ils petents sco er las vischnancas che avessan en sazez l'incumbensa da controllas da la cumpletta dals documents savens surdumandads. In ulteriur problem saja che las autoritads d'examinaziun e permis-

siun n'hajan betg avunda resursas persunalas per pudair dumagnar las fatschentas entaifer il temp spetgà.

Examinaziuns supplementaras èn necessarias

Gia en la resposta ad ina incumbensa Parolini da l'onn 2013 haja la regenza annunzià in'examinaziun da la participaziun da las organisaziuns da l'ambient a proceduras. Schebain quai accelerass effectivamain las proceduras stoppia anc vegnir examinà pli detagliadamain.

L'incumbensa haja era la finamira d'amplifitgar il catalog da projects da construcziun che na basegnan betg ina permissiun che è cuntegnida en la lescha. Sche quai è admissibel sut l'aspect da la definiziun da la permissiun da construcziun en il dretg federal sco er opportun ord vista d'ina terza persuna

pertutgada d'in project stoppia anc vegnir examinà pli profundamain. Interessant en quest connex saja che gist las vischnancas èn sa dustadas en l'ultima revisiun da la lescha da planisaziun cunter in catalog memia generus. Quai perquai che ellas temaivan da perder la controlla sur dals fatgs da construcziun sin lur territori communal. Pervia da quai haja stuì vegnir concedi a las vischnancas il dretg da pudair restrenscher sezzas il catalog. Da quest dretg hajan er insaquantas dad ellas fatg diever.

Proceduras electronicas

La procedura da permissiun electronica menziunada en l'incumbensa Cramer saja tematisada en la strategia d'informatica da la regenza. Scleriments en quest connex duain vegnir fatgs ils onns 2017/18. En vista a las incumbensas che èn sin program sin il sectur da la digitalisaziun stoppian dentant vegnir resguardadas las resursas persunalas e finanzialas da l'uffizi per il svilup dal territori.

Concernent ils documents che ston vegnir inoltrads per ina dumonda da construcziun dettia facticamain basegn d'agir. Tschertas autoritads da permissiun pretendian vairamain mintgatant scleriments effectivamain nunnecessaris.

Plinavant renda la regenza attent al fatg che la nova lescha davart il svilup economic ha gia introduci l'instrument necessari per coordinar las proceduras d'in project concret ed i stoppian vegnir stgaffidas las resursas correspundentas tar l'uffizi d'economia e turissem cumpetent. «Dal rest tutgia i tar la lavur quotidiana dals uffizis chantunals da sustegnair uschè bain sco pussaivel las vischnancas en cas da fatschentas complexas e da dumondas giuridicas, sche las persunas permettan quai e sche las resursas persunalas permettan quai e sche quai n'è betg problematic sut l'aspect da princip da l'imperialitad da las autoritads da permissiun.